



31348/A

KLOTZ, C. A

DES. 4/52



Edw. Jeff



865-71

M O R E S E R V D I T O R V M

Illos, qui virtuti et gloriae sunt mancipati, exceptos et praecipuos habui: eorum vero, qui alio inepte abeunt, neminem singillatim offendo: vitium ipsum carpo et infector. Quis hoc mihi culpae vertat?

Aur. Ianuarii resp. ICtorum. p. 38.





VIRO DOCTISSIMO

G. F. L.

S. D.

*Quae nos clanculum saepe risimus,
VIR DOCTISSIME mihi-
que Charissime, ea aliis quoque deriden-
da propinare volui: siue, quoniam non
plane indigna sunt, quae a compluri-
bus legantur, siue, quia omnia, ab
eleganti Tuo ingenio profecta, mihi
non possunt non iucunda et luce publica
digna videri. Equidem fauorem et
plausum indoctae plebeculae neque spero,
neque sperare possum; (tum enim aliae
artes fuissent discendae, versiculi teu-
tonici scribendi, carmina Anacreontica
componenda,) hanc tamen scriptiuncu-
lam si non plane Tibi displicere intelli-
gam, sicut dulcissima Tua natura et
illa*

illa amoris erga me Tui frequens significatio spem affert certissimam, numquam me mei poenitebit. Nosti me, o Charissime, nosti animum meum, nec Tibi igitur, quantum a libidine viros bonos et doctos perstringendi abhorream, erit ignotum, nullaue alia de caussa haec a me scripta esse Tibi persuadebis, quam ut, quicquid ex sciolorum et semidoctorum hominum imperitia et impudentia collegi stomachi, libere effundam. Ceterum, quae a deditissimo Tibi animo expectari possunt, officia et debebo Tibi, et praestabo, quoad viuum, lubenter meritoque. Vale.

EPISTOLA PATRIS AD FILIVM
IN ACADEMIA COMMORANTEM.

THE FIRST PART OF THE

IN THE HISTORY OF THE

Quanto me dolore affecerint literae
 tuae, fili, in quibus certiore me de
 tuorum studiorum ratione fecisti, neque
 ego oratione exprimere possum, neque tu
 coniectura facile adsequeris. Quid enim
 dicam? tene graecas et latinas literas dis-
 cere? me viuo te poetarum et oratorum
 libros legere? o mi fili, per amorem me-
 um, qui singularis semper et eximius in te
 fuit! dic, quaeso, quis te malus error ad
 Ciceronem et Platonem legendum impu-
 lerit? Nonne hi scelestissimam egerunt vi-
 tam? Nonne a vera Dei cognitione alieni?
 Nonne apud inferos suorum scelerum poe-
 nas luunt? Abstine, fili, abstine ab ho-
 rum lectione. Ego vix nomina horum ho-
 minum noui, cum tam opulentum, tam
 amplum sacerdotium capefferem, tota ut
 in regione nostra nullus alius tot anseres,
 boues et vaccas alat, nullus tot iugera

agri possideat. Quid porro est, quod te Vulgatam legere scribis? O quantum tibi irascor! Romanus papa vulgata vtatur, nos *ὁρθοδοξότεροι* illam cane peius et angue fugiamus. Abiice librum, si me amas, si a me amari cupis. De Symmachi et Aquilae interpretationibus, quas tibi magno vsui esse scribis, quid dicam, nescio. Numquam enim horum nomina ne fando quidem audiui. Est non procul a nostro pago Aquila quidam, qui an biblia interpretatus sit, nescio. Sed velim, praeter vnā Lutheri versionem nihil in biblicorum vero sensu eruendo in consilium adhibeas. Ingrati est animi, cuius se crimine nostra aetate plurimi nasuti obstringunt, iis vti nolle, quae Dei clementia nobis concessit, auxiliis. Antea erat fortasse graecarum et ebraicarum literarum scientia non inutilis: nunc vero sunt Lutherana versione omnia ita explicata, illustrata atque exposita, nihil

vt praeterea opus sit addere. O! si tu meis consiliis, quae tibi discedenti dedi, obtemperares! Nonne tibi dogmaticam et homileticam Theologiam audiendam sedulo et toto pectore imbibendam esse monui? nonne vt singulis mensibus bis terue e suggestu verba faceres, praecepi? Nonne vt sacra carmina et edisceres et iis, tanquam stellis, orationem tuam distingueres, auctor fui suasorque? Quam bene tu, antequam in Academiam abiisti, ad populum dixeris, non sine summo voluptatis sensu recordor. Numquam rustici mei, quam scite latinas sententiolas immiscueris orationibus tuis, obliuiscuntur, teque laudare desinent. Perge igitur ea, quam iniisti, via ad metam contendere. Nosti praeterea, te iam duo annos in Academia commoratum esse, atque adeo tempus tui reditus instare. Monuit me per hosce dies de hac re dominus pagi nostri, seque tibi ancillam

suam in matrimonium esse daturum ita promisit, ut tibi vna certam spem in munere mihi succedendi faceret. Quare velim omnibus rebus posthabitis oeconomicum collegium audias, neque in re, magnae tibi utilitati futura, vlllo modo negligens sis. Adiunxi hisce literis duo egregios libros, *den allezeit fertigen Prediger* et *Dispositiones auf alle Sonntags-Evangélie*, quibus si recte utaris, numquam te eorum poenitebit. Hi digni tuo studio, hi tibi panem, munus et uxorem pollicentur, non graecae tuae et latinae literae, quibuscum algebis et esuries. Ac ne me solum ita sentire credas, mitto vna literas compatristui, cui maxima eius cum admiratione totam rem exposui. Cuius consilio, (nostri viri integritatem et eruditionem) ita velim obtemperes, ut, si aliter facias, me tecum numquam in gratiam esse rediturum, tibi persuadeas certissime. Vale.

EPI.

EPISTOLA FRATRIS

AD FRATREM.



DOMINO SVO FRATRI
PLVRIFARIAM DILECTO

CORDIALEM SALVTEM.

Quod Vestro filio illapsum sit, possum ego non inspicere. Fui totus extra me, cum suam epistolam legi, et capilli mihi steterunt ad montem. Non sumite mihi pro malo, Vester filius est nasutulus, et non vult Vobis paternum Respectum dare. Hoc non est bonum, et non erat alias sic. Quando meus filius mihi sic facere vellet, daturus essem illi non
paruas

*paruas Reprimandas. . Sed iuuentus se non
 vult sinere corrigere. Quid ille vult, ob coe-
 li voluntatem! cum graeca lingua facere?
 ille potest immo non unum canem cum omni
 sua scientia ex fornace elicere. Est haec lin-
 gua diabolice gravis, et non ego potui com-
 prehendere, quamvis, et Vos scitis, bonum
 caput habui. Potest non Lutheri versionem
 in manus sumere et nasum in illam porri-
 gere? Ego etiam fui in una alta schola, aut
 Universitate, et habui fideles praeceptores,
 qui mihi bene dixerunt, quod talem sapien-
 tiam ad pacem finirem. Plato sedet in ge-
 benna, et omnes ethnici habent nihil melius.
 Custodiat me coelum pro talibus libris. Esote
 tam bonus, Domine frater, et dicite Vestro
 Ello*

filio in meo nomine viam pulchram salutem,
et ego sino illum petere, ut adspiciat, ne se-
ducatur a noua parturientibus. Ille debet
bene saepe concionari. Ille oportet etiam au-
dire Polemicam, ut diabolicos haereticos pos-
sit de suggestu iacere. Nam in nostris die-
bus, postquam philosophia ad asserem venit,
hi se faciunt valde inutiliter. Philosophi
et Iuristae sunt libri spiritus, et periculosi
homines. Nam non credunt spectra, et qui
non credit spectra, ille est Atheista. Enim
heri mea ancilla vidit unum tripodem lepo-
rem apud vaccarum stabulum. Valet cum
uxorilla Vestra. Seges apud me bene stat,
et futura est profitabilis messis. Ego ven-
didi multum triticum, et fui ipse in nun-
dina

dina cum nostro templi-stulto, qui sibi fecerat bene, et vix poterat inuenire viam post domum. Totam enim urbem potest sub mensam potare. Habet multum cor, et nuper totum pagum perfussavit. Nam ad multum zechauerat. Valet adhuc semel.

EPISTOLA POETAE AD

AMICVM.

Nescio, hercle! quomodo accidat, vt, quoties, cum quae prospera, tum quae aduersa mihi eueniant, cum familiaribus communicare possim, quasi onere quodam leuatus recreatusque mihi videar. Nam, et, quam primum versus aliquot composui, eos recitare maximopere cupio, et nunc quoque, o Charissime, ad te confugio, in te conquiescere, in tua suauitate curas doloresque deponere gestio. Agam tecum, vt officia nostra mutua summaque amicitia postulat, vt studiis nostris dignum est, perfamiliariter, et tale tibi amoris mei testimonium impertiar, quo maius expectare ab amico, eoque poëta, non potes. Felicem me semper ter et amplius praedicasti, qui omnibus gaudiis affluens,

omnibusque deliciis quasi immerfus et obrutus omnium optime lautissimeque viverem, nihilque optasti magis, quam ut simili modo vitam ageres. Neque hoc mihi mirum. Nam si ex carminibus meis aliquis coniecturam faciat, rege Persarum me feliciorem esse Iouem lapidem iuraret. Quid enim in illis nisi Phyllidis amores? nisi blandi virginum susurri? quid nisi munera laeta Bacchi? amoenitates ruris? laudes vitae priuatae? contemptus regiae maiestatis et purpurae? Sed, caue, tu rem ita se habere credas. *Veri nihil, omnia falsa.* Primum quidem nescio, qua fati iracundia accidat, ut nulla in re mihi peius cesserit, quam si in amatorio negotio aliquid molitus sim. Quot, eheu! non carmina, quot non versus ad illam, quae me furripuerat mihi, scripsi! Modo per audaces verba dithyrambos deuolui, in altos nubium tractus tendi, et, quid enim dissimu-

mu-

mulem? Miltoni et Iungii carmina bene com-
 pilauī; modo per humum repere mihi vi-
 sum est. Centies illam solem, lunam,
 Dianam, Venerem, et quid non? appel-
 laui. Centies oculos stellis, os rosae, ge-
 nas liliis comparaui. Quibus artibus an
 me aliquid effecisse putas? Immo vero ve-
 hementer irrisus sum. Quare aliam viam
 iniui. Crudelem illam vocaui, homici-
 dam, leonibus truculentiorē, me mori-
 turum esse dixi, me laqueo et ense mihi
 vitam erepturum, minatus sum. Omnia
 frustra. Misero modo illa mihi illusit.
 Me bicipitem in tergo Parnassum gestare,
 capite vacillare, crura tanquam falces cur-
 uata, turgida labra et aures longas habere,
 quae sic moueantur, vt solent asellorum.
 Constitui igitur, nihil eiusmodi posthac
 tentare, sed mordaci iambo illatas iniurias
 vlcisci, animumque vindictae cupidum sic
 fatis explere. Vna est vetula quaedam

*Forta comam labroque tumens et fusca
colore*

*Pectore lata, iacens mammis, compres-
sior aluo,*

*Cruribus exiguis, spatiosa prodigo
planta,*

cui meam rem familiarem commisi. Illa me quotidie vesperi inuilit, ex aduerso confidet, tantaque cum admiratione me versus recitantem audit, ut plerumque dulci somno sopiatur. Atque ego quidem non minoris artis atque ingenii esse puto sopire carminibus homines, vetulas praefertim, quam bestias mollire, fluuios morari, et auritas quercus ducere. Tu vero vix credere potes, quanta cum animi laetitia quantaque superbia elatus, si, quae per diem scripsi, cuiquam recitare potuerim, me quieti dare soleam. Haec igitur de amoribus meis habeto. Audi reliqua

liqua. Domicilium mihi est angustum, obscurum, in suprema parte aedium. Unde non solum hoc incommode mihi accidit, ut quasi in caelum aut turrim mihi sit adscendendum, (ego vero, quoties ascendendo, me ad ardua Parnassi culmina tendere, credo) sed fumus quoque ex propinquo fumario me non parum excruciat. Hic nullos, ut tu fortasse putas, flores, nullos argenteos riuos, nulla gemmantia prae-
ta, nec te, quae *carminibus viues tempus in omne meis*, dulcis Philomela, video. Nulla hic avis, praeter garrulos passerēs et raucum bubonem, quem vel venturi luctus vel dirae mortis nuntium esse (quod dii non tam mea, quam literarum causa prohibeant!) ex vetula mea saepius audiui. Hinc ferme numquam excedo, nisi concionatoribus paganis, qui inter maecenates meos iure suo primum locum occupant, infantulum gratulaturus. Quod tamen

non raro vsu venit. Nam quot apud illos libros, tot prope pueros puellasque video. Tunc vero genium meum minime defraudare soleo, sed tam large me plerumque inuito, vt neque pes neque caput officium suum faciant. Alias aquam bibere cogit res angusta domi, quam tanta copia haurio, vt nuper febrim mihi accerferem. Habes, o dulcissime, vitam meam, tanquam in tabula expressam. Vtinam quidem mea in scribendis versibus facilitas et celeritas, qua me neque, si ab inferis redeat, Homerus vincet, tantae sit mihi utilitati, quantae illam gloriae fore video. Intelliges vero, quantae sint mihi molestiae deuorandae, quantis et animi et corporis laboribus fatiger, quantum mihi cum siti et fame conflictandum. Quas ego miserrimas non tantum ad animum reuoco, quantum tu fortasse arbitraris. Alia sunt, o anime mi, quae me misere excruciant,
quae

quae omnem prope ingenii vim extinguunt, quae me dies noctesque excruciant. Quid enim quaeris? frigent hac aetate diuina poëtices studia, actum est, periimus vates, nobis exequias ire iam tempus. Est enim perpetua haec malignaque fati lex, ut, quae ad summum peruenerunt, citius opinione ad infimum rursus relabantur. Nihil dicam de iis, qui antiquitati nimium pretium statuentes, et nihil, nisi quod redoleat Romanorum Graecorumque, horribilium, me hercle! et obscurissimorum librorum, lectionem, laudantes, me, tanquam rerum omnium imperitum, vix limina aedium intrare patiuntur. Iidem illi mercatores, quos decies Apollines, Maecenates, Mercurios appellauī, quibus immortalitatem nominis nec vnquam interituram famam praedixi, quorum cru-

ditionem et humanitatem praedicaui, etsi barbari erant et stolidorum duces, quos tanquam terrarum dominos colui, neque me, neque carmina mea amplius curant.

„Quid hic mendicus? semperne fores obfidi-
 „det? Res suas sibi habeat. Bello exhausti sumus. abeat. Tum qua me iracundia efferri, quantum stomachari putas? Vellem faciem meam videres. *Ardent minaces igne trau-
 lento genae, oculique vix se sedibus retinent suis.* Neque tamen aliud solatium inuenio, quam ut, quicquid splendida bilis suggerat, euomam, et satyras conscribam. Quod quam miserum sit aridae gulae et lattranti stomacho solatium, tu non ignorabis, qui olim ipse carmina confecisti. Sed de his fatis. Vereor enim, ne tibi his querelis molestiam aliquam afferam. Sic tamen habeto, me haec scribentem

largam

largam lacrumarum vim profudisse, non stomachi mei causa, etsi hic magno cum murmure suum flagitabat, sed communis utilitatis causa. Caeterum nihil magis expeto, quam ut quam proxime ad te aduolare, et in sinum tuum omnia mea effundere possim. O qui tum complexus! quae confabulatio! quae recitationes! Composui enim per hosce dies praeter Anacreonticos versus, in quibus me imprimis felicem esse nosti, qui vna horula saepe ducentos non multo sudore chartis illinam, duo carmina non ignobilis argumenti: quorum in altero Phyllidem meam Dianam, me Actaeonem, et deinde in leporem (nam verbum cerui, quod, ut nosti, ponendum erat, metri ratio non admisit, neque ego synonymum in *Gradu ad Parnassum* inueni) in leporem igitur mutatum

tum esse, facetissime finxi; in altero de
systemate Copernicano exposui, et mer-
catori opulento novas nuptias gratulatus
sum: Ambo, quod caput est, bene lon-
ga sunt. Quare, ne tibi diutius hanc
voluptatem inuideam, quam primum fieri
poterit, in tuos complexus veniam.

Interim vale.

EPISTOLA

DE

ITINERE IN VTOPIAM.

Nihil opus est, Charissime, plura de Vtopiae incolis incolarumque moribus ad te scribere, de quibus in proximis literis ea omnia dixi, quae digna et iucunda cognitu esse putavi. Venio nunc ad ea, quae te imprimis scire velle arbitror, ut, quae sit in hac regione literarum facies, qui doctorum hominum mores, exponam. Quae igitur mihi a sapientissimis Vtopiae ciuibus commemorata sunt, accipe. Est nuper admodum ibi a principe Academia instituta, in loco antea obscuro et ignobili. Huc toto ex orbe magnis praemiis docti viri conuocati sunt, quorum animos, incredibile est, quanta superbia inuasert. Hanc Academiam literarum domicilium, eruditionis emporium, omnis elegantiae sedem, augustissimum totius orbis museum esse, non

non tam alii credunt, quam ipsi dicunt. Si quis aliter esse putat, (audiui vero, esse non paucos, qui aliter putent,) parum abest, quin ipse se ne hominem quidem esse fateatur. Quod in aliis terris scribitur, dicitur, iudicatur, contemnunt, perstringunt, certe apud se his omnia meliora provenire clamitant. Inde fit, ut bonis et doctis viris saepe conuitia faciant, et laudanda reticentes, quae vituperari possint, magna cum ambitione proferant. Neque tamen hoc omnium audiui esse vitium, sed duorum praesertim, qui sibi soli sapere videantur. Alterum, aiunt, tanquam Palaemonem aliquem, quicum natae litterae, quicum moriturae, in linguarum scientia et grammaticae cognitione regnare velle, ut quicumque idem conentur, illis bellum indicat; alterum in interpretatione librorum, quibus religio incolarum contineatur, aemulum ferre non posse.

Ambo,

Ambo, alias non aptissimos ad iocandum, satyricos videri et facetos esse velle; ambo grauitur in eo labi, quod de omnibus rebus iudicare, omniaque scire velint; inde euenire, vt se saepissime turpiter dent, nihilque propius abesse, quam vt dictatores perpetui reipublicae literariae a suis suorumque similibus creentur. Praeterea multa ridicula de alio doctore audiui, qui mori malit, quam non ingeniosus videri. Neminem, dicebant, scire, qua ille in scientia domicilium ingenii sui constituerit; nam Theologum, Grammaticum, Historicum, Ictum esse velle, neque esse quicquam scientiarum, quod non delibauerit; ingenii gloriam illam mirifice deperire; hinc gibbosos homines pulcros, rixosas mulieres modestas, et timidos fortes dicere; si quis suae improbitatis defensorem habere cupiat, hunc adire solere; quare factum sit, vt numerus librorum, ab illo

scriptorum, iniuri non possit. Haec mihi de Academia hac commemorarunt, quae vera, an falsa sint, nescio. Neque enim tam diu ibi commoratus sum, ut ipse ad animos moresque hominum attendere potuerim, quoniam mirifica cupiditate alteram Vtopiae Academiam visendi flagrabam. Ad hanc peropportuno tempore perueni. Ipso enim eo die, quo accessi, res maxime memorabilis ibi accidit. Fuit sapienti consilio a Principe constitutum, ut, qui leges scite et docte interpretentur, et perfectam iuris scientiam teneant, amplissimis honoribus decorarentur, iisque facultas, publice ius docendi, daretur. Qui honos ICro alicui eo die habebatur. Quod, quomodo actum sit, breuiter commemorabo. Nam ob fauorem nobilium quorundam ad omnia admissi sumus. Conueniunt mane, quibus illud erat negotiatum, ut ingenium et eruditionem candidati

didati explorarent, in conclaue, atque ego vna, plenus timoris et spei. Neque enim exiguum horrorem mihi venerabilis iniicit species virorum tam feüero vultu, vt citius ex pumice aquam, quam ex his risum, exprimas, longissimisq; capillamentis ornatorum. Mensa erat ibi oblonga, cyathis, calicibus et phialis plena. Videbar mihi in cauponam peruenisse. Varia confabulantur, nugantur, et candidato nouum honorem antea gratulantur, quam de eruditione aliquid compertum habent. Tandem discumbitur. Longa mora interposita incipit, qui inter caeteros eminet, aliquid ex candidato quaerere. Arrigo aures. Hic obmutescere, subridere et interroganti poculum propinare; ille rursus quaerere; hic magis mutus quam piscis. Quid, quaeres, alii? quidam per fenestram in plateam despicere, alii librum legere, plerique auide bibere. Ego multum ex-

spectare, quem res habitura sit exitum. Repente confurgunt omnes, se satis candidati ingenium tentasse profitentur, et, bene potati, lepidissime iocantur. Candidatus refertum numis marsupium producere, et in mensa numerare. Tum vero omnes ad mensam confluere, et qui antea dormire mihi videbantur, lynceis oculis argenti species internoscere. Unus per familiariter mihi in aurem: quid tibi, o charum caput, de numis hisce videtur? Vidistine unquam antiquiores? Pecunia accepta omnes egregiis laudibus candidatum extollere, illumque *dignissimum* esse nouo honore per Themidem iurare. Verum erat alterum examen candidato subeundum. Est enim legibus sancitum, ut honores hosce petiturus libellum aliquem scribat, siue etiam ab alio scriptum accipiat, et palam contra dissentientes defendat. Scripserat hic etiam libellum, nescio cuius

cuius argumenti. Erat enim barbare et inficete scriptus. Hoc suo cum libello, charta inaurata ornato, ascendit excelsiorem locum, et praesentes inuitat, ut, si cui aliter de re proposita videatur, suam sententiam libere proferant. Illi deinde multis ambagibus respondere, laudare candidatum; hic laudes renuere; omnes his mutuis confabulationibus tot bonas horas perdere, ut paullulum temporis seuerae disputationi relinqueretur. Ego qui non prope a loco, ubi consistebat candidatus, aberam, illum videbam oratiunculas has non memoriter dicere, sed e chartula recitare. Quare, quoniam saepe haesitabat in dicendo, non ipsum illas composuisse, sed ab aliquo accepisse, suspicabar. Tandem accedit aliquis, omnium qui in se oculos et ora conuertit. Candidatum videbam modo erubescere, modo pallere, alios vero, nescio quid, sibi insusurrare.

Quid multa? Alloquitur candidatus illum, ut mos est, atque, ut reliquorum exemplum sequatur, suamque de libello sententiam dicat, petit. Ille, qui mihi vir liberi oris, multae eruditionis et acuti ingenii videbatur, grauiter et seuerè suam sententiam proponit, et variis interrogationibus bonum candidatum tantas in angustias adigit, ut multo sudore perfunderetur, nihilque propius abesset, quam ut a praesentibus exhibilaretur. Placuit mihi vehementer viri ingenium, qui ex animo et serio rem agebat, nec magis mirabar, quam indignabar, cum vnus ex iis, quos antea in conclauis, aut, si mauis, symposio videram, illum tacere iuberet, suamque *Veto* interponeret. Ille tacet, hic multis solemnitatibus honores capeffit, auditorium dimittitur, ilicet. Admirabar ego mecum ridiculos hominum mores. Neque latuit animus meus virum proxime
ad-

adstantem, qui, ne mirearis, ait, hospes. Ita est nostrorum hominum ingenium. Hic non genus tantum et formam, sed eruditionem quoque et ingenium regina pecunia donat. Totum ius ad vnguem calleas, fideli pectore omnium ICtorum sententias condideris, quicquid est vbique librorum, deuoraueris, numi si defint, numquam hunc tibi honorem habebunt. Sis stipes, caudex, asinus, et asinorum asinissimus, modo non egenus, statim summa dignitate dignus videberis. Est enim eo res adducta, vt, quem antea paucis habebant, hunc iam omnes accipiunt honorem

- - - omnes qui velle fatentur

Nullus, vt expertum est, inde repulsus
abit,

Atque boni, atque mali, stupidi minimum-
que sagaces,

Infima plebs, et flos nobilitatis item. *)

C 4

Ecce

*) Ianuar. resp. ICt. pag. 33.

Ecce tibi illum iuuenem, inberbem, et ab ipsa natura ad contemptum abiectum. Ille in ipsis literis, quibus, ut Iuris Doctor renunciaretur, petiit, se in iure quidem hospitem, in aliis vero literis probe versatum esse, fassus est, et posteaquam iam Doctor renunciatus fuit, tum demum prima initia iuris ab alio Doctore didicit. Tu vero impudentiam hominum mecum ride, et vale.

FRAGMENTA ZOPYRI.

Succenseamne magis fortunae, quae tot saecula egregiis Zopyri sententiis carere voluit, an gaudeam, quod mihi potissimum earum in lucem proferendarum copia facta est? Quo casu, loco et tempore fragmenta haec reperta sint, non opus est multis commemorare. Duo tamen monebo. Erant illa quidem graeca lingua conscripta, sed quoniam ego, (memor iuris iurandi, quo, cum ICtorum ordini adscriberer, adstrictus sum) nihil ea maiori odio habeo, habeboque, dum viuam, atque etiam complures alios, et opibus, et honoribus, insignes idem mecum sentire scio laudoque, tradidi homini egeno et inepte diligenti

graeca

graeca in latinam sermonem transferenda. Adiicere idem voluit *perpetuum*, ut dicebat, *commentarium*, *variarum lectionum libellum*, et *indicem rerum ac verborum copiosissimum*. Nolui autem alienis ornamentis Zopyri decus conciliare. Sunt huic libello sequentes inscriptae literae

Q. I. R. C. M. H. D. E. F. F. Q. I.

quae quid significarent, nulla coniectura assequi potui. Homo vero meus criticus se in collectaneis suis inuenisse testatus est, esse quosdam, non exigua eruditionis laude florentes, easdem qui literas dissertatiunculis et libellis suis inscribant, quid vero indicent, vna se mecum ignorare. Nunc ad Zopyrum ipsum veniamus.

INCI-

INCIPIT ZOPYRI LIBER.

Cap. I. „Si quem obuium habes, qui
 „totus ossa atque pellis est, qui quasi la-
 „terna Punica pellucet, et sic macet, ut
 „exta in sole inspicere liceat; qui, multa
 „murmurans, caput scalpit, ungues rodit,
 „et in digitorum extremis tacite} verba
 „enumerat; qui te ultro alloquitur, mo-
 „do os, tanquam aliquid dicturus aperit,
 „modo labra dentibus mordet, manum in
 „vestem demittit, sensim chartam protrahit,
 „tum oculo intento, laeto huic hominum
 „generi proprio, sed difficili dictu, et qui,
 „ut interrogas, quid in illa scriptum sit,
 „flagitare videtur, te aspicit; tandem in
 „omnes partes se versat, quasi locutu-
 „rus, nec orationis principium inue-
 „niens, *tunc fugite, o miseri! fugite.*
 „Si paullulum commoreris, vix vius
 „discedes. Nescisne poetam hunc esse?

Eneca-

„Enecabit te versibus suis. *Quare age,*
 „*rumpe moras.*

Cap. II. „Hominem pallidum, dimissis
 „tibialibus, eorumque altero nigro, alte-
 „ro albo incedentem, oculis vibrantem,
 „caelum intenta acie intuentem, modo
 „huc, modo illuc, cursitantem, modo
 „subsistentem, modo ambulantiem, te sa-
 „lutantem non resalutantem, saepe equos,
 „boues et arbores, tanquam homines, sa-
 „lutantem, et, capite ad aedes offenso,
 „quasi ex alto somno excitatum, respiran-
 „tem, hunc igitur mathematicum esse, et
 „de quadratura circuli, incolis lunae aut
 „fluxu et refluxu maris meditari, scito.

Cap. III. „Sunt, qui incedunt, tanquam
 „Cereris sacra gestantes, gressu superbo,
 „alta fronte et auratis vestibibus per plateas;
 „*albae rutilant in vertice cristae:* magni-
 „fice se circumspiciunt, aliosque tanquam
 „foenum generoso cum risu prae se con-
 „tem-

„temnunt. Cum canibus ludere, equi-
 „tare, gladium vibrare, saltare, venari,
 „et *tercentum donare deos* illis sola sapien-
 „tia: caput si introspicias, quisquiliis illis
 „nouerca natura dedit pro cerebro, nulla
 „*in toto corpore mica salis*: similes illi tem-
 „plis Aegyptiorum, quae magnificis co-
 „lumnis, ostiis, et arcubus exornata, in-
 „tus canem, felem, vel ridiculum murem
 „seruant: libros magistrorumque scholas,
 „tamquam pestes, fugiunt: quaeras ex
 „iis aliquid de artibus, quibus respublica
 „gubernetur, obmutescent: incipe de
 „chartulis lusoriis loqui, Homerum loqua-
 „citate superabunt: velis, nolis, quae sua
 „sit in hac re astutia, audies: generis et
 „stirpis mentionem iniicias, auos et atavos
 „enumerabunt: ne forte incredibilia tibi
 „narrare videantur, superos et inferos ad
 „confirmandam fabulae veritatem inuoca-
 „bunt. Mox digitis crepitabunt, vno pede
 „salta-

„saltabunt, et ore aliquid pipient. Iidem
 „post aliquot annos, otio et desidia trans-
 „actas, ex poculo, quod sapientes et do-
 „ctos efficit, bibent. Quomodo enim alias
 „esse potest? In consilium de maximis rebus
 „adhibentur, rem publicam gubernant,
 „exercitus ducunt, de literis literarum-
 „que flore iudicant, de maximi momenti
 „rebus decernunt. Attende paullulum,
 „quae cohortes clientium atria eorum ob-
 „sideant, quibus osculis vestem conterant,
 „quam supplici gestu et voce sibi fauorem
 „expetant; illi vero, quo supercilio, quo
 „capitis motu, nullo ridente, de pace et
 „bello disputent, qui inter muliercu-
 „las educati nihil aliud sapere, nihil
 „aliud discere potuerunt, quam omnes
 „alios, non albas cristas gestantes, con-
 „temnere.

Cap. IV. „Paedagogi et ludimagistri ha-
 „bitus hic erit: vestis nigra et fordida,
 „capil-

„capillamentum horrendum, toruus vul-
 „tus, incessus rusticus, obesum corpus,
 „tacitae in ore increpationes et dirae, mi-
 „nax in dextra baculus, quem saepe tam-
 „quam imperator, milites in ordinem re-
 „dacturus, tollet, quo saepius vacuas au-
 „ras verberabit. *Occursare capro, cornu*
 „*ferit ille; caueo,*

Cap. V. „Typographus, si forte quem
 „quaerat, cui Ephemeridum, oratiuncu-
 „larum Teutonicarum, odarum Anacreon-
 „ticarum scribendarum cura committenda
 „sit, attendat, num vastum sit corpus,
 „gladiatorius incessus, firma latera, lacer-
 „ti carnos, longi digiti, in quibus non
 „magis, quam in capite aut cerebro sa-
 „pientiam et ingenium sedem fixisse, ab
 „idoneis auctoribus traditur.

Cap. VI. „Philosophum facile agnosces:
 „curvatum corpus, caput crassum, digiti
 „graciles, facies fraudulenta: frontem

D „saepe

„saepe manu atteret, sibi ignotos, aut
 „alienos a se, vultu misericordia pleno ad-
 „spiciet, ad laudem suam subridebit, alia
 „si in haeresi te esse dices, arriget aures,
 „contrahet frontem et ringet: alius si
 „philosophi compendium laudabis, can-
 „descendit genae, erigentur crines, plenus
 „vultus irarum et calidae rixae. Ipsum si
 „posthac te secuturum promittes, blande
 „tibi manum premet: rediens domum Ve-
 „neri litabit atque Baccho, et, quae in
 „cathedrae umbra mane turpia et noxia esse
 „docuit, vesperi iucunda et pulcra existi-
 „mabit.

Cap. VII. „Non aliter Ictos veros et
 „magnificos, aut si mauis Realistas et ho-
 „mines practicos, quam veste nigra, lon-
 „ga, et tanquam ex Priami aetate asser-
 „uata indutos videbis. Capillamentum
 „instar nubis supra tergum suffusum eos os
 „humerosque deo similes reddit: venter
 „tam

„tām turgidus, vt ipsi vix calceos oblon-
 „gos et latos adspicere queant: vultus mo-
 „rosus et rugis plenus, in digito annulus
 „instar compedis, baculus et gladius atquo-
 „rum aetatem referens; bini sequentur et
 „legent diuina vestigia famuli, immensam
 „chartarum molem sub brachio gestantes,
 „ingemiscētes saepe et succumbentes pro-
 „pe oneri. Hos tanquam miracula miran-
 „tur, hos nudato capite salutant, horum
 „ob os ora obuertunt sua.

Cap. VIII. Si doctorum qui eruditissi-
 „mus sit, qui fons et oceanus omnis do-
 „ctrinae habeatur, cui maxima iuuentutis
 „studiosae pars operam det, intelligere
 „cupis, *paucis aduerte, docebo.* Erecta
 „fronte et calamistrata coma per plateas

„volitabit, vnguentis affluet, suauissimo
 „odore, quasi totus roseus myrtheusque
 „aëra implebit, pileolum gestabit sub bra-
 „chio, argenteo gladiolo cinctus habebit
 „vestem sericam, versicolorem, breuissi-
 „mam, obuios curuato eleganter tergo,
 „pede dextro ad sinistrum retracto, et pi-
 „leolo vsque ad pedes manu demisso salu-
 „tabit, offeret pyxidem, puluere sternu-
 „torio plenum, tanta arte, vt inuitus
 „etiam annulos in digitis fulgentes videas,
 „singulis momentis horologium longis au-
 „reis fibulis ornatum e braccis extrahet,
 „quaedam de tranquillitate aëris et serenita-
 „tate caeli mira linguae volubilitate dicet,
 „ludet subinde cum canicula, producet
 „acta publica, quid de eruptione hac mi-
 „litum,

„litum, de illa obsidione urbis sentiat,
 „exponet, multa denique iactatione ma-
 „nuum in viros doctos declamabit. *Na-*
 „*te dea, quae te tam laeta tulerunt saecula?*

Haec sunt, quae e Zopyri libris ad nos
 peruenire voluit fortuna. Vellem fati be-
 nignioris indulgentia reliqua boni philoso-
 phi e tenebris, quibus sepulta iacent, pro-
 trahantur, monumenta. Caeterum, etsi
 se bona fide egisse testatus est Grammati-
 cus meus, vereor tamen, vt fragmentis
 his vertendis, sic, vt virum bonum de-
 cet, versatus sit. Ex quo enim horum ho-
 minum furta deprehendi, eosque, qui li-
 bris in aliam linguam vertendis operam
 dant, non minus famelicos, quam lupos,
 esse intellexi, vix dici potest, quam suspe-

Etum mihi sit, quicquid agant. Quod
ignorare vos, lectores, nolui, ne, quod
aliena culpa factum sit, meae siue
malignitati, siue ignorantiae,
tribuatis.

DIALOGVS

INTER

BVRMANNVM ET CHRISTIVM.

Exstinctum est nuper morte praematura, et omnibus Musis Gratiisque luctuosissima, ingenium *Christii*, viri summi, qui, etsi cum naturae, tum gloriae, fatis diu, literis profecto, quarum egregius vindex statorque fuit eximius, parum vixit. Lugent literae, quibus hoc casu grauiissimum et capitale vulnus inflatum est, suum primarium decus; sepeliuere non sine lacrimis virum publico elegantioris literaturae bono natum; amiserunt quantum nescio, an reparari possit? Viget tamen vigebitque *Christii* memoria omnem cultiorem orbem peruagata, et donec suum bonis literis statuetur pretium, omni posteritati probitatis, honestatis, grauitatis, humanitatis et accuratae, promptae, vastae, et elegantis doctrinae erit exemplum. Viuet

in immortalibus suis scriptis, viuet *Christus* in animis omnium bonorum. O quanto tui desiderio, beatissima anima, aestuabunt musae! quam saepe ego te requiram! te audire, tuo aspectu recreari cupiam! nullibi autem, nisi nocturnis in somniis, inueniam.

Atque heri cum conuicia non verbis refutanda, sed coercenda verberibus, legissem, quibus umbram *Christi* canis furiosus allatrare voluit, et deinde me quieti dedissem, visus sum mihi in Elysiis campis versari, ibique, ut in somno animus noster facile in ea incidit, quae vigilantes cogitauimus, *Christium* videre ambulantem. Grauis erat viri incessus, et in vultu maiestas quaedam et mirificus decor. Curstabant hac atque illuc animae, et nouum hospitem aspiciebant. Aliae vultum illius erubescere, et sibi inuicem in aures insusurrare: „discedendum hinc esse ocyus, hunc
„esse,

„esse, cui multa surripuissent, se ne furti
 „rei postulentur, timere. Aliae statim allo-
 qui *Christum*, prenare manus, sua in lite-
 ras merita enarrare, suum in homines do-
 ctos studium et amorem mire extollere, in
 contemptum literarum declamare: parum
 aberat, quin bonum *Christum* iterum ene-
 cassent, nisi alium vidissent, sibi igno-
 tum, ad quem aduolabant, et mira lin-
 guae volubilitate eadem iisdem verbis ef-
 furiebant, ut orationem aliquam edidicisse
 viderentur. Hanc dum impudentiam et
 ineptum inclarescendi studium miror, ad-
 uenit, ecce! senex quidam. Imaginem
 mihi antiquitatis et columnen literarum vi-
 debar intueri. Ut horribilis hic erat ad-
 spectu! ut teter incedebat! quae contra-
 ctio frontis! quam morosa et pallida fa-
 cies! Supercilio enim, tanquam Atlante
 caelum, tota res publica erudita niti vi-
 debatur. Dextra libellum proferebat dia-
 bola-

bolarem, sinistra tenebat lutum, et omnes, quibus hic libellus minus probaretur, luto inungere minabatur. Quem *Christius*

*Vt primum iuxta stetit, agnouitque per
vmbra*

statim videt esse illum, quem olim aduersarium parum humanum et doctum nactus esset. Quare, homo ut sistat gradum, inimicitiasque deponat, poscit, atque molibus ardentem et torua tuentem lenit dictis. At ille non magis, quam dura filex aut marpesia cautes sermone mouetur, sed labia distorquens, et quaedam secum murmurans aufugit. Quem cum sequeretur *Christius* et longius procederet, obuium sibi videt virum serenae frontis, et cuius ex oculis generosa animi indoles elucet. Statim *Petrum Burmannum* esse intelligit. Multa vltro citroque dicuntur, disputatur de variis, tandem sic incipit:

Burm.

Burm. Iam dudum gestit animus, quae sit literarum facies in Germania, quae studia doctorum hominum, Criticorum maxime, cognoscere. De his, nisi graue, velim mihi exponas.

Christ. Vereor, hercle! ne, ex qua tu narratione iucunditatem capere speras, ex ea plurimum doloris et molestiae in te redundet.

Burm. Scio, quid dicas. Mihi non semel bilem audacia criticorum mouit. Putabam vero eam bonorum virorum virtute tandem compressam esse.

Christ. Compressam putas? aucta vero illa est, et in dies augebitur. Quid enim quaeris? nullus est, cum graecorum, tum latinorum scriptorum, quem non fordibus suis conspurcent nostri capitales Critici, qui illud veteris lenae metetrici datum consilium; *spolies, mutiles, laceres, quemquem nactus sis, summa cum religione* obser-

obseruant. *Fœdissima illis ventris preluuiis
vncacque manus.*

*Tristius haud illis monstrum, nec saenior
vlla*

Pestis et ira deum stygiis sese extulit undis.
Si quem audiant, nouam alicuius auctoris
editionem moliri, statim coniecturas suas
ad eum mittunt: neque paucas illas esse
fortasse credito, sed tota volumina. Has
coniecturas, quibus se praeclare veram
lectionem restituisse gloriantur, ipsam
εὐσυχίαν sibi in aurem infusurasse somniant,
et tam bonas, bellas, venustas et certas
esse censent, vt ne ipsa quidem dubitatio
de illis dubitare debeat. Quare, tam-
quam de tripode locuti, nullas causas suae
crudelitatis exponunt, sed satis habent,
regium illud, *lege, scribe, sic muta, ex in-
genio sic emendo*, addidisse

*celerique fuga sub sidera lapsi,
Semefam praedam et vestigia fœda relinquunt.*

Burn.

Burm. Tantum vero mea aetate nunquam sibi indulserunt Critici. Addebant certe bellissima haec: *hoc non latinum, quis hoc Ciceronis ingenio dignum existimet? sic elegantius*, et similia: quae licet inepta et febriculosi hominis indicia, toleranda tamen; at tu intolerabilia commemoras, et nullo modo ferenda.

Christius. Hoc solo si acquiescerent, beati essemus, gratulandum reipublicae et literis. Sed audi, quaeso. Tota eduntur volumina, coniecturarum acutissimarum, si diis placet, quibus humanum genus lepidi Criticastro beant. Causas, cur vulgatam lectionem reiiciant, frustra quaeres. Exiguo temporis spatio interiecto, quae *suo periculo* paullo ante mutari iusserant, aliter rursus emendant. Atque haec quidem insania eo processit, ut, cum nullus sit bibliopola, talibus qui libris imprimendis vendendisque rei familiaris periculum subire

subire velit, ipsi sumtum suppedident, et deinde prope fame pereant.

Burm. Qui vero sunt tandem illi, quibus tam putidum cerebrum, tam perpruriscientes digiti?

Christ. ἄγροος ὕχλος, ὠθεῖνθ' ὡς ἔσε. Neque tam iuuenes hoc se parricidio polluant, sed senes imprimis repuerascunt quam plurimi. Accepi ab homine, cuius fides mihi nullam ob causam suspecta est, se suis oculis vidisse, antesignanum et coryphaeum horum Criticorum, poetam graecum, quem numquam antea legisset, in tertio versu ex ingenio emendasse, et vna horula quinquaginta emendationes facili negotio protulisse. Eundem, addebat, hanc sibi quasi legem fixisse, ut nullum auctorem prius de manibus deponeret, quam illum hoc beneficio affecisset, omnesque auctores se eadem ratione esse tractaturum, promississe.

Burm.

Burm. Vehementer equidem vereor, ne noui Critici hoc plane efficiant, vt nulla veterum scriptorum vestigia agnosci possint!

Christ. Habebit profecto erudita respublica citius opinione omnes veterum libros nouas in formas, id est, ex hominibus in porcos, mutatos. Atque ego saepius optaui, ne Plutarchi posthac, Chrysostomi, Polybii, Aristidis nomina suis scriptis praefigerentur, sed illorum, stulta qui haec somnia nobis obtrudent. Quid enim bonis scriptoribus relictum est? quis eos arbitrio suo loqui patitur? quis non melius illis graece et latine intelligit?

Burm. Hosce tamen lucumones, hosce petrones et rupices Criticos appellant, et

correctores veterum librorum? hanc proletariam turbam hoc nomine ornant? Corruptores et pestes literarum illos rectius dicerent, qui omnem, quam antiquitati debent, religionem fusque deque habentes tanta audacia et proteruia in bonos scriptores saeviunt. Nullusne vero impetus horum homuncionum compescere, nullusne hanc pestem a literis auertere conatur?

Christ. Sunt quidem docti et egregie cordati homines, sed perpauci. Alii clanculum hanc insaniam ridere, quam sibi inimicitias et odia contrahere, malunt. Alii, quod in illis reprehendunt, ipsi vitium committunt. Perstrinxerunt quidam

dam grauissimis verbis hanc temeritatem, quos quid effecisse putas? pergunt inepti homines, quam semel iniuerunt, viam calcare, quare quiescere malunt boni viri, illos miseros esse libenter iubent, et genio suo irato relinquunt. Res enim profecto iam eo perducta est, vt alio auxilio, aliis defensoribus opus sit. Nam vt, si ciuis alteram iniuria affecit, magistratus auxilium imploratur, atque tali modo a proteruitate multi retinentur; sic vt Portiae, Fabiae, Semproniae leges in erudita republica ferantur, maximopere optandum est. Equidem me nihil melius scire, ingenue fateor. Neque enim Aesculapius tribus Anticyris haec capita sanare posset.

Burm. Qua igitur fronte plerique florere nunc literas, aureum esse saeculum, suum literis statui pretium, suum decus, clamitant.

Christ. Hunc vero clamorem non semel mecum rili. Primum enim, quis potest esse literarum cultus, quod decus scientiarum, si tam inhumano, tam barbaro more in veteres scriptores grassamur? a nullis libris si rapaces et crudeles ungues continemus? quemuis si impune atque etiam cum gloriola commaculare? si vrere, secare, mutare, expungere licet? Deinde vix dici potest, quam ridiculas opiniones imbiberint homines de veterum auctorum doctrina. Tonant quotidie, cum philo-
sophi,

sophi, tum theologi, fulminant, et veterum libros opprimere minantur.

Burm. Non inaudita et noua narras. Hoc hominum genus omni elegantiori literaturae dudum bellum indixit, atque ut eo cum maiore mercede fallat, religionis speciem praetendit.

Christ. „Pudeat, inquiunt, nos Christi-
 „anos hominum flagitiosissimorum libros
 „legere. Pudeat ab iis aliquid discere
 „velle, qui in omne voluptatum genus
 „effusi tot tantisque se sceleribus comma-
 „culauerunt, ut grauissimis a sanctis viris
 „verbis castigarentur! ”

Burm. Hisce vero sermonibus magnam inscitiam acuti viri mihi prodere viden-

tur. Nam si, quae de paucis, certe non omnibus, dicantur, ad vniuersum referri populum debeant, nonne facile totum hoc telum retorqueri potest ab hominibus improbis? quoties enim Iudaei ab iisdem viris sanctis accerrime castigantur? quid igitur, si illorum in ratiocinando morem imitetur quispiam, efficietur? sed haec intelligentia non cadit in pallium et capillamentum concionatorum, quos pudet eorum vtilitatem fateri, quae ignorant. Quid vero? elegantium Ictorum magnam multitudinem esse accepi.

Christ. Non erras. Elegancia enim novas nuptas et omnes virgines facile superabunt. Accedas illas: contemplantes inuenies in speculo formam suam, vehementer-

menterque curantes, ne pilus vnus in coma ceteris altior exstet, ne minima in tibialibus sericis ruga fiat, ne pallidae genae, ne nimium rubicundae. Magnam iidem elegantiae partem in libris eleganter ligandis collocant, nec vltimam curam Icti in eo esse ponendam censent, vt Wie-lingium aurea veste ornatum habeant. Inde accidit, vt, ne forte splendor et aurum detergatur metuentes, raro suos libros attingant et euoluant. Hosce si Ictos elegantes appellas, nae magnam inuenies turbam. At qui Ciceronem, qui Liuium, Dionem, reliquos veteres scriptores legerint,

*Apparent vari nantes in gurgite
vasto.*

Plurimi, *prolatis siluescentibus in ore consiliis*, ut ait magnus Cuiacius, *opinionibus, decisionibus doctorum innumeris, qui clamosi rabiosa fori iurgia vendunt improbi, et iras et verba locant*, hi igitur se omnem elegantiore literaturem tanquam nugas, neque panem, neque cereuisciam, sibi comparantes, tanquam quisquilias, scholam redolentes, contemnere, omni posita fronte, profitentur, satisque habent, si *volumen Actorum* (hoc enim iis semper in ore) apte conglutinare, eleganter sub brachio gestare, et barbaras aliquot voces, *terminos* vocant, celeriter blaterare possint, si prodiga infrenisque sit lingua, ut fluat semper et aestuet colluione verborum terribissima, si facundiam rabidam iurgiosam-

que

que exercere et tam celeriter scribere debeant, ut *litera verbum sit*

*Vt notis linguam superent, cursuque
loquentis.*

Scin' vero, quomodo suam ignorantiam defendant? arrige aures, admodum belle ratiocinantur. „Quicumque, aiunt, leges corrigit, ille est pestis reipublicae, „atqui Critici corrigunt leges, nonne ergo pestes reipublicae?

Burm. Baldi et Bartoli familiam nar-
ras.

Christ. Alii nihil, nisi Cuiacios, Alciatos, Duarenos, reliquos, quorum nominibus adfurgas, crepant. Neque tamen illos legerunt umquam, neque, si lege-

rēt, intelligerent. Hi sola nomina doctorum solosque indices librorum nosse docti putant, de reliquis non curant.

Burm. Atque hi, ut sunt ingenia hominum, maximis honoribus floreant: horum erit summa auctoritas et celeberrimum nomen.

Christ. Quidam, sed pauci, regia illa et recta via ad veram eruditionis gloriam contendunt, sed prope soli in auditoriis relinquuntur.

Burm. O miseram literarum faciem!

Christ. Tum vero demum, miseram esse literarum faciem, diceret, si, quomodo in veterum auctorum libris edendis nostri homines versarentur nosset. De quocumque

que auctore in somnio cogitauerunt, illius edendi consilium capiunt. Nullos libros manu exaratos in consilium adhibent, sed iuuenibus ex antiquis Aldi, Stephani, reliquorum editionibus varias lectiones, aut, si mauis, errores operarum, excerpendas committunt. Addunt commentarium docti alicuius viri; si quis ludimagister dissertatiunculam scripsit, illam inserunt, et portentosam praefigunt praefationem. Hic, quae in Fabricio aut Mattairo de editionibus auctoris inuenerunt, paullisper verbis mutatis, vt signa rerum ablatarum a furibus detrahi solent, repetunt. De suo ingenio neque addunt quicquam, neque additas aliorum adnotationes, non immunes saepe ab erroribus, emendant. Mercedem

dem a bibliopola non exiguam accipiunt, et sua cura et studio singulis, non annis, sed mensibus, talem editionem in publicum emittunt.

Burm. Non differt multum haec edendorum auctorum ratio a Schreueliana et Pitisciana.

Christ. Atque hi tamen editores invidendis laudibus in caelum extolluntur, eorumque libri exempla edendorum veterum librorum audiunt. Tum vero vellem ridiculas hominum pugnas videres. Illi nostrorum concionatorum, qui docti videri cupiunt, neque tamen viam ostendendae eruditionis, quam nullam habent, tenent, errores operarum in his editionibus multo fudore inuestigant, in circulis
gravi

gravi vultu et loquaci dextra recitant, et inuidiam facere editoribus conantur. Hi, vt genus horum hominum irritabile est, hanc libertatem non tolerandam esse, clamitant, et si conuitiis aduersarium proscindant, bene se rem gerere credunt.

Purm. En cor Zenodoti, en iecur Cratetis!

Haec taliaque cum loquerentur viri docti, aduenit Criticus quidam eorum ex familia, in quam modo *Christius* declamauerat, et, vt flumen traiceretur, a Charonte postulat. Qui cum hominem toruo vultu aliquandiu adspexisset, nonne, per deos immortales! inquit, te idem ille, qui mihi olim nomen meum voluisti eripere, aliterque legendum in omnibus

libris contendisti? Faciam, ut iam tuae temeritatis poeniteat. Quibus dictis statim contum attollit, et miseri homuncionis lumbos adeo dolauit, ut ego hoc tumultu subito expergiscerer.

PRŌDIGIA.



Oceani finem iuxta solemque cadentem

Vltimus Aethiopum locus est

unde nuper binas literas accepi, quas non possum non, quin cum lectoribus meis communicem. Nam non solum varia scitu digna et iucunda lectu in illis scripta sunt, sed lubet etiam in hac re nostrae aetatis nostrorum hominum consuetudinem imitari. Qui si in Anglia, Italia, Gallia docto viro, cui ea de causa aliquot annos obstrepuerunt, vnum epistolum extorserunt, caelum se putant digito attingere.

O quid tum in omnium manibus? quid in ore, nisi hae literae? accedas illos. velis nolis, praelegent tibi canora voce et hilari ore. Quod si semel fiat, beatus eris; iterum iterumque bellas literas audies. Atque ut posteri quoque et omnes, qui ubique sunt, idem sciant, typis illas proxima occasione exscribendas dabunt. Quid? quod non pauci literas, quasi ab exteris regionibus ad se perlatas, fingunt, in his honorificentissime de se praedicant, et inuidendis se laudibus extollunt. Sed hoc crimen fortasse a maleuolis et inuidis, quorum omnia sunt plena, effictum est. *Sed quid ago?* (ut ar enim diuina arte oratorum nostrorum, qui, si natalem, nuptias, novos honores, aliis gratulaturi, antea de

lato

lato clauo, de haruspibus, de cloacis romanorum, de mundo optimo dixerunt, bellissimo hoc, *quid ego? nunc se ad te mea conuertit oratio*, tanquam Deo ex machina aduocato, facillime se expediant) *quid igitur ego?* literas propinare volui. En ipsas.

Quod dudum optaui, suauissime, vt et beneuolentiam meam et studium tibi inseruiendi testificari possem, illius efficiendi optabilem occasionem, quae in hac terra quotidie accidunt, attulerunt. Nam, quoniam tu mihi illud negotii dedisti, vt si quid esset memoratu dignum, ad te perscriberem, tanta et tot scito, apud nos esse prodigia, neque visa, neque audita prius,

vt quasi in nouum orbem terrarum delati
nobis esse videamur. Omitto, (nam et
mens meminisse horret, et te eiusmodi re-
bus numquam fidem habere, compertum
habeo, cuius incredulitatis ne te poeniteat
olim, vereor,) omitto igitur globum
igneum e caelo delapsum, horridas voces
exauditas, et in nubibus leones, equos,
ursos, visos esse. Quae quin ita sint, non
est dubitandi locus. Videre illa omnia
homines, auribus et oculis sani, concio-
natores nostri, cum rure opus facerent,
et saepius inde occasionem nos monendi,
adhortandique laeti arripuere. Heri qui-
dem vnus eorum tam flexanima oratione
impendentia mala enarrauit, tam lugubri
voce, tam diserte, eadem prodigia olim

irru-

irruptionem hostium, famem et frigus praedixisse demonstravit, ut per subsellia fletus et suspiria, vetularum maxime, orientur, ego vero, ne crebris ictibus percussus suggestus in caput decideret, non parum timerem. Neque tamen, ut dixi, plura de his addam. Audi alia, maiora, incredibilia, quae neque antea somniasset quisquam, neque ventura aetas credet, iracundi antea, clamosi, dira illuie promissaque barba horribiles, nec faciles visu, nec dictu villo affabiles, semper baculo et virgis, semper consularibus fascibus armati desierunt per tergum vicinasque tergo partes viam et aditum ad animum puero- rum quaerere, paedagogi. Quam placidi nunc! quam humani! quam elegantes!

nulla verbera, nullae dirae, nulli metus.
Nosti mores philosophorum nostrorum.
Nunc vide quam mutata sint omnia. Nemo philosophiam tamquam artificium venale addiscit, nec, magister antea, quam discipulus, aliter vivit, quam vivendum esse praecipit, aut inutilis disciplinae exemplum in se circumfert. Nullas contortulas et minutas conclusiunculas, nullas difficiles nugas, nullas de ente, de monadibus, de principio indiscernibilium disputatiunculas in scholis eorum audies. Alii in foro, in castris, in republica, in aulis principum versantur, alii iuuenum animos ad virtutis honestatisque praecepta, ad rei publicae administrationem, ad praeclaras in bello et pace res gerendas, con-

for-

formant. Omnes vno ore antiquitatem laudant, veterumque librorum lectionem commendant. Nulla superbia, nullae rixae, nulla conuitia. Praterno amore se inuicem complectuntur, raro a se dissentiunt, si dissentiunt causas dissensus exponunt, nec eos, quibus alia mens est, atheos, nec corruptores iuuentutis, nec flagitiosos esse pronuntiant. Saepe, quae antea docuerunt, re melius intellecta, vltro damnant, erroremque ingenue fatentur: *olim, aiunt, deceptus sum, aliquid humani sum passus, me errasse scitote.* Nulla denique in libris orationis obscuritas, nulla verborum insolentia. Quantus contranitor! qui flores! quae venteres! quam lactea vbertas! Ciceronis animum in omnes

immigrasse crederes. Medici totam suam artem coniecturis niti fatentur; nemo periculis hominum discit, aut experimenta per mortes agit. Neque vitra vrinaria inspiciunt, et inde, quam aetatem habeat aegrotus? mas sit an femina? iuuenis an maritus? vitamne sit recepturus an amissurus? qua sit veste indutus? bellamne habeat vxorem? et sexcenta alia vaticinantur, neque in tam contrarias sententias abeunt, vt, quod alter tanquam vnicum sanitatis tuendae praesidium commendet, alter, quasi venena Colchica, reiiciat, neque sanos et integros medicamentis suis, quae *praeseruatiua* audiunt, occidunt. Timeo, hercle! ne tu me rem augere, aut, tonforum more, mentiri suspiceris.

Bona

Bona vero fide ago. Nam haec lufum iocumque effe dices, caetera demum fi audias. Nullum doctum hominem liberalium artium confectatio moleftum, verbofum, importunum, fibi placentem, facit: non numerant, fed aestimant, quae et ipfi fcribunt, et ab aliis fcripta funt: non aucupantur humili arte multitudinis plaufum, fed vel in fua confcientia, vel in paucorum bonorum laude acquiefcunt, non ideo literis operam dant, vt vel opes, vel honores, fibi acquirant, fed vt bene de humano genere mereantur: non bibliopolis feruiant, nec ad illorum arbitrium libros componunt: non portentofos et fplendidos titulos libris praefigunt, non sentiendi

libertatem tollunt, breui, sic viuunt, vt, si vel in aurum priscum tempora redeant, nihil maius meliusue esse possit. Quid dicamus de theologis? incredibile dictu est, quam auide graeca et latina discant, quantum studii in historia collocent, quam humani sint erga aduersarios, quam abstineant a publicarum rerum administratione, quantum cum criticis et grammaticis amicitiam contraxerint, in quos probitatem et pieratem cadere, antea negabant, in quos declamabant e suggestibus, quorum doctrinam, tamquam pestiferam, summa ope deprimere conabantur. Ponebant enim tum omnem scientiam in clamore, volubilitate linguae: bonum theologum
puta-

putabant, qui tres annos in academia commoratus, (vbi, supra compendiolum sapere, nefas erat,) deinde munus concionatorium accipiat, vxorem ducat, liberos bene multos procreet, cereuiciam coquat, in agris opus faciat, vt et animarum et cuium vaccarumque pastor sit: illum vero omnibus numeris absolutum et columen religionis existimabant, qui aliquot orationes, compilatas plerumque et exscriptas, edidisset. Dudum intelligo, te, quid Icti agant, scire, percupere.

Huc geminas nunc flecte acies, hunc aspice

gentem

plane

plane nouam et quafi a Medea recoctam. Quot antea per decem vrbes, quarum singula viginti alit ICtos, caperata fronte, graui vultu, magna populi comitante ceterua incedentes, omnes magnificos, omnes doctores, frustra quaesiueris, Corpus iuris, nunc in singulis aedibus inuenies. Protrahunt ex tenebris veterum ICtorum egregia ingenii monimenta, et manu diurna nocturnaue versant. Hos ad fontes, tanquam diuturnam sitim expleturi, festinant. Tam graecas, quam latinas antiquitates, ad vnguem callent, rem numariam, diplomaticam, et alia, de quibus altum antea silentium, probe tenent, puro, dilucido et eleganti scribendi

di genere vtuntur. Sunt, fateor, aliquot, veteres mores qui retineant. Sed caput eorum nuper subita morte extinctum est, idemque vt reliqui fatum subeant, vna omnes voce precantur. Nihil enim, nisi cum moriantur, recte facere illos dicunt. Vides, quanta sit omnium rerum mutatio et confusio.

*Nulla tenet veteris quicquam vestigia
formas.*

Atque ego aut vehementer fallor, aut terrae nostrae nisi summum diem et vltimum terminum, horribile certe aliquid impendere arbitror. Accedunt vaticinia quaedam, tabulis aeneis incisa, et casu per
hosc

hodie dies in agro suburbano inuenta,
quae, ne et longior sit haec epistola, et
mihi ipse occasionem saepius tecum
confabulandi praecidam, in aliud
tempus reseruavi.

Vale.



DE

VERA INCLARESCENDI VIA
EPISTOLA.

Ego vero numquam committam, ut, quam de meo in te amore et beneuolentia concepisti, et qua ego, ita me dii ament, sic delector, ut nulla alia re magis, te spes decipiat. Quare neque precibus tuis honestissimis deesse debui, neque te quicquam eorum, quae adhuc semper duxi tacenda, celare potui. Petiisti vero in literis tuis a me, ut tibi regiam illam viam, gloriam atque honores facillimo negotio consequendi, ostenderem, et in ignoto itinere dux essem. Iam illud certissime tibi velim persuadeas, me, quaecumque moneam, propria edoctum experientia monere. Ipse eam, quam tibi monstra-

G

bo,

bo, viam iniui, ipse hac via amplissimos honores accepi. Tu igitur

qua facere id possis, nostram nunc accipe mentem.

Primum, velim, indices nouorum librorum, ephemerides, diaria, noua literaria, et eiusmodi libros, in quibus de laboribus doctorum iudicium fertur, numquam de manibus deponas. Illi tibi sint illi fontes, ex quibus omnem eruditionem haurias. Praecipue vero moneo, ut annum locumque, quo liber editus sit, et quid in illo reprehendatur, tanquam clauitrali memoriae ita insigas, numquam ut inde effluat. Hac igitur cognitione si te probe instructum esse senties, non solum in circulis aequalium, sed apud viros doctos

Etos quoque, quaecumque tibi videntur
 vtilissima, ex illo penu depromes. Edif-
 ces etiam loca aliquot pulcra, ex graecis
 poetis, et simul emendationes aut conie-
 cturas criticorum memoriae mandabis.
 Haec recita data occasione, graui vultu,
 et magna celeritate, haec iterum iterum-
 que repete. Si quem audies librum scri-
 bere, quanto ocyus aduola, et te indi-
 cem esse additurum promitte. Hic est
 primus gradus, quo ad maiores honores
 adscendes. Ille enim in fine praefationis
 honorificam tui mentionem faciet, teque
 reipublicae eruditae optime commendabit.
 Quam iucundum vero sit, ista legere,
*indicem fecit iuuenis humanissimus, optimis
 artibus excultus, et magno olim ornaento*

literis futurus, vix credere potes, nullo cum praesertim, certe exiguo labore, eiusmodi praeconia comparentur. Deinde velim ipse aliquid scribas, et, ut per ora virorum volites, efficere studeas. Quod si ex antiquitatibus romanis aliquod argumentum elegeris, tibi optime procedet. Sunt enim de his multa volumina scripta, ex quibus facili negotio libellum conscribes. Prae omnibus aliis autem Pitisci velim lexica, quae tibi etiam atque etiam commendo, in consilium adhibeas. Hinc nos toti pendemus, hinc omnium scholarum rectores sapiunt, hinc tu, quantum libet, sumas. Hic vero illud in primis operam des, ne quem locum, quem ille ex veteribus libris laudavit, omittas.

Quo

Quo plura tu loca adscripseris, eo doctior videbitur liber, eo maiorem tibi famam comparabit. Neque opus est, ut ipse veterum loca euoluas. Laboriosum hoc est, patientissimi diligentiam fatigat, et frustra etiam hanc laborem suscipies. Nemo, recte laudata sint illa loca, an perperam, modo sint multa, inquireret. Si quem locum laudas, adscribe interdum diuersam lectionem, veluti - *aut ut ex MSCtis legit doctissimus* - . Si literas hasce MSC. videant homines, quantum tuae eruditionis famae accedat incredibile est. Charta sit nitidissima et exornata tabulis aeneis, lepidum aliquid et facetum exhibentibus, veluti musas, hunc vel illum doctum exhibilantes. In praefatione te multis nego-

tiis distractum horis subcessuis haec scripsisse fateberis, atque etiam librum ab amicis subreptum, aut precibus et blanda vi extortum, te inuito edi finges. De hoc porro libro ut bene in ephemeridibus iudicetur variis artibus, de quibus alio tempore exposui, efficies. Denique eundem eleganter vestitum fac quam primum ad omnes, qui ubique sunt, eruditos mittas. Pro quo si tibi per literas illi gratias agant, quid tum aliud facies, quam ut eas omnibus in circulis recites, atque etiam, si apte fieri potest, typis exscribendas tradas? Sin ad primas tuas forte non respondeant,

Tu ne cede malis, sed contra audentior ito.

Iterum, tanquam illae priores forte non perlatae essent, scribe tertium. Non fru-

stra

stra hunc laborem consumes. Hic est ille, infusurrabunt sibi inuicem homines, quem Bataui suspiciunt: vix credas, quam crebras ex Italia literas accipiat, quam multi eius familiaritatem expetant: tunc de illius eruditione dubitas? ah! nescis, qua fama apud externos floreat! Scribes vero potissimum ad illos, quorum est in collegio aliquo eruditorum, societates dicunt literarias, aliqua auctoritas. In quae ut eo facilius coopteris, eleganti modo aureolum munusculum tuis literis adiunges. Famelica est horum hominum natio. Lubenter te suo ordini adscribent. Tum vero, caue, in titulo libri illud: *membrum societatis* - omittas. Alia via inclarescendi, sed paullo difficilior, haec est. Si quem in exteris regionibus, eum-

que

que mortuum, magna fama vigere audias, aduersus hunc calamum stringe. Admirabuntur homines tuam sapientiam, et te, tanquam de caelo delapsum, suspicient.

Heu! quibus ille

Iactatus fatis, quae bella exhausta canebat!
 Ipsa in re si nihil reprehendendum sit, ipsum auctorem persequaris, et quaecumque Latium suggeret, effundas conuitia. Huius certaminis quacumque occasione mentionem facias, nec semel descendas in arenam, sed, ut plurimarum palmarum nobilis gladiator habearis, cures. Verum haec haec
 atenus. Plura in crastinum!

Vale.

25-20

